



NATUR

"Wat huet e Flapp Koudreck mat enger Flantermaus ze dinn?"

Mir kennen se als Vampiren oder als Superheld. Mee d'Edmée Engel vum Naturmusée an de Laurent Biraschi vun der Forstverwaltung wësse méi iwwert d'Thema Flantermais.

woxx: *Wat sinn eigentlech déi gängegst Viruerteeler iwwert d'Flantermais?*

Edmée Engel: Datt se Knascht oder Schued maachen, do wou se sech ariichten.

Laurent Biraschi: Oder datt se de Frae géifen an d'Hoer fléien.

E.E.: Dobäi gräife Flantermais de Mensch guer net un. Nëmmen a Südamerika gëtt et d'Vampirflantermaus, déi och Blut leckt. Mee bei eis interesséiere se sech nëmme fir Insekten.

L.B.: Dat mat den Hoer gouf wahrscheinlech vun de Männer erfionnt, fir datt hir Fraen net owes spët sollten erausgoen ... (laacht)

E.E.: D'Flantermais sinn iwwregens och guer net wierklech blann. Si gesinn net gutt an nëmme schwaarz-wäiss, dofir orientéiere si sech haapt-sächlech mat Ultraschall.

Firwat si se eigentlech nëmmen nuets aktiv?

L.B.: Am Dag sinn d'Villercher do, déi sech vun den Insekten mussen ernieren. An

der Nuecht kommen dann d'Flantermais. Dat huet sech esou aus der Evolutioun erginn.

Wéi kënnt d'Flantermaus dann un dee schlechte Ruff?

L.B.: Et sinn nun emol Nuetsdéieren, an déi maachen Angscht.

E.E.: Et ass jo och onheemlech, wann e beemol déi däischer Schieter iwwert engem säi Kapp ewechdauschen. Mee vun no gekuckt sinn déi Déiere genee sou léif wéi en Hamster zum Beispill. Pelzeg, mat klengen Aen an enger Schnuff. Dat eenzezt wat anescht ass, sinn déi plakeg Flilléken an déi spatZ Zänn. Déi brauche se fir d'Schuel vun de Kiewerleken opzeknacken.

A wat wëssen d'Leit soss nach alles net iwwert d'Flantermais?

L.B.: Datt si am Fong dee beschten ökologeschen Insektizid sinn, deen et gëtt.

E.E.: Ech soen de Leit ëmmer: Wann et d'Flantermais net géif ginn, da géift dir am Summer op ären Terrassen am Gedéiesch ënnergoen.

L.B.: A si sinn e gudde Bio-Indikator.

Dat heescht?

E.E.: Flantermais loosse sech nëmmen do nidder, wou d'ökologescht Gläichgewicht nach intakt ass. Si brauchen eng grouss Variétéit un Insekten an déi gëtt et nëmmen do, wou genuch Planze sinn. Sou bal d'Flantermais iergendwou verschwannen, da wësse mer, datt eppes an der Kette Buedem-Planzen-Insekte-Mamendéieren net méi stëmmt. Dat ass vill méi einfach, wéi wa mer géifen ufänken all eenzelne Kiewerlek ze zielen.

L.B.: Meeschtens ass d'Verschwanne vun de Flantermais en Zeechen dofir, datt op enger Plaz massiv Insektizid gesprézt gëtt.

E.E.: Wat huet zum Beispill eng Flantermaus mat engem Kouflapp ze dinn? Ma d'Breitflügelflantermaus erniert sech, wa se niert, nëmme vun engem Kiewerlek deen aus der Koumescht kënnt. Wann d'Kéi net méi dobaussen op de Weede stinn, da schéisst bei där Zort

Flantermaus d'Stierflechkeet vun de Jonken direkt an d'Luucht.

Stinn d'Flantermais zu Lëtzebuerg ënner Schutz?

L.B.: Jo, all Flantermais stinn op der roudler Lëscht. Dat heescht, et ass strafbar se doud ze maachen oder hir Liewesräim ze zerstéieren.

E.E.: Dee gréissten Deel vun der Aarbecht, déi de Laurent an ech maachen, ass, datt mir d'Ufro vum de Leit entgéint huelen, déi Flantermais bei sech doheem hunn an datt mir dann op d'Plaz no den Déiere kucke ginn.

L.L.: Dat ass heiansdo schonn ustrengend, wanns de zu Rodange wunns an du muss owes nach op Woltz no engem Nascht kucke goen. Mee et ass einfach wichteg, d'Leit ze sensibiliséieren an hinnen ze erklären, datt Flantermais net schiedlech sinn an datt een hinnen hire Liewesraum soll loosse.

E.E.: D'Leit sollen eis allerdéngs nëmme dann urufen, wann se wierklech en Nascht bei sech doheem hunn, net wann si der dobausse fléie gesinn. Well déi kënne mir net lokaliséieren.

L.B.: Et geet eis jo och dorëm, fir d'Fuerschung widerzebréngen, fir genee opzeschreiwen, wéivill vu wéi enger Zort et wou ginn.

Wéi gesäit et mat der Fuerschung zu deem Thema aus?

E.E.: Zu Lëtzebuerg souwuel wéi och op europäeschem Niveau ass d'Kooperatioun an deem Beräich virbildlech. Mir hunn hei e Flantermauskoordinatiounsgrupp, an deem d'Forstverwaltung an den Naturmusée vertruede sinn. Et ginn hei am Fong véier Leit, déi sech haapt-sächlech mat de Flantermais beschäftegen. De Laurent an ech an déi zwee Wëssenschaftler Christine Harbusch a Jacques Pir, déi bal nëmme um Terrain ënnerwee sinn. Op europäeschem Niveau koordinéiert Eurobats souwuel d'Fuerschung wéi och de Schutz vun den Déieren. Zurzäit lafen zwou grouss Recherchen zu Lëtzebuerg, ënnert anerem iwwert d'Bëschflantermais, iwwert déi mer zum Beispill ganz wéineg wëssen.

L.B.: Mir hunn zu Lëtzebuerg lo och vun eise 400 Kierchen der 68 opgemaach fir d'Flantermais. Dat heescht, datt mir eng kleng Öffnung, eng Chiroptère, abaue gelooss hunn, duerch déi d'Flantermais erakommen, mee d'Dauwen net.

Wou loosse sech déi urban Flantermais dann am léifsten nidder?

E.E.: Dat hänkt vun der Zort of. D'Groußmausohrflantermaus sicht oppe Räim wéi Kierchen oder Schlässer, genee

wéi d'Wimperflechtermaus. D'Zwerg- an d'Breitflügelflantermaus gi sech mat sougenannte Spaltequartéier zefriden, dat heescht, si fanne Plaz an enger Rolluedekëscht oder an der Holzverkleedung vun enger Fassad.

L.B.: An der Regel kann ee soen, dass de Kierper vun enger Zwergflantermaus sou grouss ass wéi en Domm an dee vun enger Mausouerflantermaus ongeféier wéi eng Fauscht. Et sinn also relativ kleng Déieren.

Dir organiséiert dëst Joer fir d'ningte Kéier d'"European Bat Night" zu Lëtzebuerg, mat Aktivitéite fir Kanner a Beobachtunge mat Infrarout. Vu datt d'Flantermaus wéinst dem Batman erëm voll am Trend ass, misst d'Manifestatioun jo gutt besicht sinn ...

E.E.: De Phänomen Batman wäert secher Auswierkungen hunn. Besonnesch well de Patrick Wilwert vum Musée och e Virtrag hält iwwert d'Flantermaus am Comic. De Batman ass iwwregens eent vun deene wéinege Beispiller, wou eng Flantermaus dat Gutt inkarnéiert. Soss ass se éischter e Symbol fir den Doud oder d'Ongléck.

L.B.: Mat Ausnahm vun deenen éischte Joëren, wou mer net souvill Leit haten, war den Interessi a leschter Zäit awer ëmmer grouss. Tëscht 500 a 600 Leit maache bei sou enger Bat Night mat, dovun 300 Kanner.

E.E.: Eis Sensibiliséierungscampagne schengt gegraff ze hunn. Emmer méi avancéieren d'Flantermais vun den Ekel-déieren bal zu de Lieblingshausdéieren.

Wéi hutt dir perséinlech eigentlech äer Faszinatioun fir déi Déieren entdeckt?

L.B.: Ech sinn eng Kéier mat deem Thema a Beréierung komm an do hat ech direkt Loscht et ze verdéiwen. Wat ech méi Bicher gelies hunn, wat ech et méi spannend fonnt hunn.

E.E.: Ech hunn d'Flantermais eréischt während menger Aarbecht am Musée fir mech entdeckt. Op der Uni hat ech nach ganz aner Interessen. Mee och nodeems ech zënter souvill Joren um Thema schaffen, ass et fir mech nach ëmmer dat Schéinst, nuets op menger Terrass ze setzen a mengen zing Zwergen nozekucken, wéi se duerch de Gaart fléien.

Interview: Claudine Muno